



Surveglianza da video – deponia Sur Röven a Zernez – decretaziun generala

Il Chantun Grischun ha deliberà avant bundant ün on ün'ordinaziun chi regla la surveglianza da video i'l territori public. Quist'ordinaziun vala a partir dals 1. schner 2019 e po gnir dovrada sco basa legala per cumüns chi nun han svesc üna ledscha cumünala correspondententa. Per reglar la surveglianza da video illa deponia cumünala in Sur Röven a Zernez as cuntinua cun ün decret general. La surveglianza cumpiglia il perimeter da la deponia e dess impustüt impedir deposit da material e s-chart illegal in quist lö, quai chi vain pretais eir da l'uffizi per la natüra e l'ambiain. La suprastanza ha trattà ed approvà il decret general.

Revisiun parziala da la ledscha da god chantunala - posiziun

Ils cumüns dal Grischun sun gnüts invidats da consultar la revisiun parziala da la ledscha da god. La posiziun preparada dals respunsabels dal cumün es gnüda approvada.

Contrat cun l'instituziun Holzvermarktung Graubünden AG

Cuntschaintamaing es il Cumün da Zernez acziunari da la Holzvermarktung Graubünden AG (ex. Reziaholz GmbH). Ad ün di d'infuormaziun dals acziunaris da la Holzvermarktung Graubünden AG es gnü adattà e cumplettà il contrat dals acziunaris in connex culla nouva società. La suprastanza ha approvà il contrat d'acziunaris ed il contrat dal marchà da laina, chi ha üna dürada da tschinch ons.

Pumpiers Zernez – cumpra da duos veiculs (salvamaint sün via e gruppa da gas) - rendaquint final dal credit

Il proget da la cumpra da duos veiculs pels pumpiers Zernez es fini ed es gnü preschantà a la suprastanza cumünala. Il rendaquint vain tut a cogniziun in sen positiv. Ad üna prosma radunanza cumünala vain il proget preschantà a las votantas ed als votants.

Demischiun sco commembra da la suprastanza cumünala dal Cumün da Zernez

La suprastanta Martina Peretti da Susch ha demischiunà sia carica sco commembra da la suprastanza cumünala dal Cumün da Zernez. Las votantas ed ils votants dal Cumün da Zernez as dessan far impissamaints regard d'ün ingaschamaint politic a favur dal Cumün da Zernez.